

■ COLUMNA

# schlc., schar., pass., comm. a b. e s.

DA SILVANA DERUNGS\*

**C**ura avais descrit vus sezs l'ultima giada? Forsa per as annunziar per ina piazza? E tge adjectivs avais duvrà? Flexibel, precis, punctual, collegial? Quants adjectivs avais en voss deposit per l'autodescripziun? Da temp en temp ma dun jau in pau temp per tschertgar tschintg plets qualifictgonts. Inspirada dad ina lectura banala. Ina saira, sfegliand in magazin, sun jau, resp. è mia egliada nunfocussada stgarpitschada, amez las scrittiras pitschnas dad inserats, sur il titel grass «vaiva vegana». In bel titel tudestg, hai jau pensà, in titel che guardass or anc meglier per rumantsch che per tudestg. Interessant svilup atgnamain, hai jau pensà: l'attribut «vegan» na figurava avant in pèr onns guess betg sco emprima caratteristica en las annunzias da contact.

**B**e dasper la dunna cun amur per ils animals sa descriva in'otra dunna sco «apart-bella». Tge munta quai? Halt betg ina bellezza, cun tratgs particulars singulars? En l'inserat suten manegia in um ch'el saja «preschentabel». Sco sch'i fiss da preschentar trofeas cun partenaris novs! (U tuttina: dentadira senza macla? manieras impecca-



blas? pail glischant?) Jau hai tschiffà tschaffen da leger quests inserats, delectada dals adjectivs aparts accumulads sin il pitschen spazi mintgamai a disposiziun. Inqual inserent dovra tantas scursanidas che persunas betg disadas cun talas lecturas han fadia da chapir ils cuntegns. Ubain ch'ellas ston duvrar lur fantasia – mintgatant memia blera fantasia. P. ex. è in «bmb» misterius lura la finala tuttina be in simpel ed innocent «bitte mit Bild».

**J**au era fascinada. Betg mo dals adjectivs. Betg mo dals condensats da descripziuns che sa muventan (sa chapescha) be entaifer dimensiuns positivas. Jau era fascinada dal fatg ch'ina gasetta surpiglia anc ozendi la funcziun d'intermediatura da l'amur. E là, nua che ni la gasetta ni in'agenzia porschan quest servetsch, datti anc il contact direct via e-mail. Tge fluriziun fantastica da nums dad

adressas anonimas ch'ils inserents e las inserentas han creà per als contactar. Ma tge diavel pomai ans vul l'inserent (m.!) tradir cun in'adressa orangenhaut@xx.yz?

**Q**ua m'occupa in'otra dumonda. Betg quella da las oranschas, mabain quella da la vaiva vegana empè da la vegane Witwe: Hai jau insumma gia vesì tals inserats per rumantsch? Apart, rest. giuv., 66/169, f., cult., schlc., indep., introv., pass., comm. a bucca ed en scrit. Scriva pplcm.

**M**intgatant valessi la paina da formular in inserat. Sche betg per la gasetta, lura almain sco exercizi per sasez – per ch'er ils adjectivs ordaifer il spectrum positiv-sulegliv chat-tian lur plaz: schlanc, scharmant, schenada, engaschè, fidà, cultivà, curvada, comunicativa, sportiva, disciplinada, superficial, musical, amical, colorica, carismatica, flegmatica, fomentada, extrovertada, passiunà, pensiunà, tolerant, empatic, ascetic, divertenta, malpazienta, maladester, sanester, perdert, alert, averta, ipersensibla, movibla, dominante, procrastinanta, ranver, verd, vanitusa, inschignusa, batterlusa...

\* Silvana Derungs lavura sco redactura dal DRG a Cuira ed ha era gugent auters plets, betg mo adjectivs.